

Kommuneqarfik Sermersuumi Taperserneqartarneq pillugu Politikki

1. Siunertaq

- Kommuneqarfik Sermersuumi sulisut tamarmik kommunip tapersiissutinik pisarneranut tunngassutilinnik periarfissanik killiliussanillu ilisimasaqassasut
- Kommuneqarfik Sermersooq tapersiinerit aqqutigalugit nittarsaassinissamut aningaasaliissuteqarnissamullu periarfissaqartoq
- Kommuneqarfik Sermersuumi aaqqissuussanut suliffeqarfiit, kattuffiit, peqatigiiffiit innuttaasullu aningaasanik tapiinissamut kissaateqartarnerat naammassineqassasq
- Taperserneqartarneq pillugu qanoq iliuseqartoqartassanersoq, tassunga ilanngullugu ileqqorissaarnissamut tunngasut, ilisimaneqassasut

2. Killiliineq

Kommuneqarfik Sermersuumi Taperserneqartarneq pillugu Politikimi, Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. 39, 9. december 2015-imeersoq (tuniniaanissamik nittarsaassisarnermut inatsit) tunngavigineqarpoq.

Kommuneqarfik Sermersuup taperserneqarnissamut isumaqatigiissusiorneranut tunngatillugu nalinginnaasumik pisartunut malittarisassaliornissaq Taperserneqartarneq pillugu Politikimi siunertarineqarpoq. Taamaalilluni taperserneqartarnermut tunngasut eqqaaneqarsinnaasut tamarmik politikimi pineqanngillat.

Kommunimi pisortat fagchefillu kommunimi Taperserneqartarneq pillugu Politikimik ilisimasaqarnissaq akisussaaffigaat.

Taperserneqartarneq pillugu Politikki pisariaqarfiatigut iluarsineqartassaaq aaqqissuunneqartarlunilu.

3. Nassuiaatit

Taperserneqartarneq

Kommune toqqaannartumik toqqaannanngitsumilluunniit inuussutissarsiateqartunit (suliffeqarfiit, kattuffiit assigisaalluunniit) aningaasanik, atortunik il.il. taperserneqaraangat kommunilu tassunga tunngatillugu ussasaarinissamut pisussaaffeqaraangat. Assersuutigalugu aaqqissuussanut imaluunniit atuartitsinermit atortunut aningaasaliineqaraangat.

Tunissutisiat

Kommune aningaasanik, pigisanik il.il. tunineqaraangat, paarlattuanik arlaannik akiliuteqarnissamik neriorsuutitaqanngitsut.

Crowdfunding

Innuttaasut, kattuffiit il.il. ataatsimoorlutik siunertamut aalajangersumut katersillutik kommunimut tunniussigaangata, assersuutigalugu pinngortitami aalajangersimasumi salinermut imaluunniit paaqqinnittarfimmut aalajangersimasumut atortussanik pisinissamut aningaasanik katersanik.

4. Najoqqutassat

Kommuneqarfik Sermersuumit taperserneqarnissaq pillugu isumaqatigiissusiornermi sutigulluunniit inatsisit atuuttut malinneqarnissaat anguniarneqartuarpoq.

Immikkoortoq 5. *Inatsisitigut sinaakkutissani* susassa qarfimmi pineqartumi inatsisit attuumassuteqartut pineqarput.

Kommune allaffissornikkut suliaqarnermut, tassa kommune innuttaasunut pituttuisussamik aalajangiiniarneranut tunngatillugu, tapiissutinik tiguisinnaanngilaq. Tamatuma saniatigut Kommuneqarfik Sermersooq immikkoortuni, inatsisitigut aningaasaliiffineqarnissaannut periarfissat naammassineqarsimasunut, tunngasuni tapiissutinik tiguisinnaanngilaq.

Saniatigullu Kommuneqarfik Sermersooq tunngaviusumik kimilluunniit, tapersersuinissamut kissaateqartumit, aningaasatigut tapiissutinik tiguisinnaavoq, taamaattorli kommune neqeroorutinik tamanit tiguisinissamut pisussaataitaanngilaq.

Taperserneqarnissamik isumaqatigiissutit kommunimi suliaassanik isumaginnittarnernut, anguniakkanut, ileqqorissaarnissamut imaluunniit politikkinut allanut naapertuutissapput akerliliinatillu. Tamanna pillugu Kommuneqarfik Sermersuumit taperserneqarnissamut isumaqatigiissusiornermut tunngatillugu assigiinngitsunik malittarisassanik suliaqarpoq.

4.1. Kinaassusersiunnginneq aamma arlaannaannulluunniit attuumassuteqannginneq

Kommuneqarfik Sermersuumi suliamut attuumassuteqarnani aamma arlaannaannulluunniit attuumassuteqarnani suliamik isumaginnittarneq tunngavigalugit taperserneqarnissamut isumaqatigiissusiortoqartassaaq. Kommunip suliamut attuumassuteqannginnera aammalu arlaannaannulluunniit attuumassuteqannginnera ingerlatsivimmi tapersersorneqarnissamut isumaqatigiissusiorfiusumi pisortaasup qulakkiissavaa. Tapersersorneqarnerup annertussusaatigut, ilusaatigut inissisimaneraluunniit arlaatigut mamiatsaataasinnaanersoq aqutsisup nalilissavaa. Naliliinermi pisoq aalajangersimasooq tunngavigineqassaaq.

Kommuneqarfik Sermersooq ukuninnga isumaqatigiissusiorneq ajorpoq:

- Politikikkut partiit imaluunniit aalajangersimasumik suliniutillit, ilaasortat qinikkat imaluunniit qinigassanngortittut
- Upperisarsiortut
- Sulisitsisut kattuffii aamma sulinermik ingerlatsisut peqatigiiffii

- Suliffeqarfiit kattuffiillu aqqi, nioqqutissaatai imaluunniit kiffartuussinerit ataatsimut isigalugit isumai akerleriissutaasinnaasut, narrujuummissutaasinnaasut, assigiinngisitsisinnaasut, naammaginangitsuusinnaasut imaluunniit ukapaatitsisinnaasut

Tamatuma saniatigut taparserneqarnissamut isumaqatigiissutit kommunimi politikkinut allanut, soorlu Peqqinnissaq pillugu Politikkimut, Peqquserluttuliorneq akiorniarlugu Politikkimut aamma Pisiniarnermut Politikkimut, naapertuutissapput.

Kommuneqarfik Sermersuumit nittarsaassinermi meeqqat inuusuttullu immikkut maluginiarneqarput, taakkua tunngaviusumik sunneruminartuusut eqqumaffigineqarput.

Kommuneqarfik Sermersuup ilisarnaataa, aqqa allalluunniit kommunip pigisaaniippata taava tamanna taparserneqarnermi ataqpineqassaaq.

4.2. Tapersiissutiniq tigusaqarneq aamma taparserneqarnissamik isumaqatigiissutini malittarisassat

Aningaasaliinermik isumaqatigiissusiornermi Kommuneqarfik Sermersuup aningaasaliisuminut kiffaanngissuseqarluni attaveqarnini attatiinnassavaa. Kommune taparserneqarnermi tapersiissutip nalinga sinnerlugu tapersiisumut tapiissuteqarsinnaanngilaq. Taamaalilluni taparserneqarnermi, kikkut tapersiisimanersut toqqaannartumik nalunaarutigineqarnerata saniatigut, tapersiisimasumit tapiissuteqaaqusissummik piumasaaqateqartoqarsinnaanngilaq.

Taparserneqarnissamik isumaqatigiissusiornermi tunngaviusumik tapersiineq Kommuneqarfik Sermersuumut pitsaasumik ussassaarutaassaaq, tassa imaappoq, tapersiineq kommunip takorluugaanut anguniagaanulluunniit naapertuutissaaq. Tapersiineq kommunip tunngaviinut naapertuuttuullunilu saqqummiukkusutaanik saqqummiussisuussaaq.

Toqqorsimasumik ussassaaruteqartoqarsimasinnaanersoq tamatigut nalilersoqqissaarneqartassaaq.

Inatsit atuuttoq tunngavigalugu tuniniaanissamik nittarsaassineq meeqqanut inuusuttunullu sammitinneqartoq, meeqqat inuusuttullu pissusissamisoortumik misilittagaqannginnerat isornartorsiuisinnaannginnerallu sunneruminarnerallu eqqarsaatigalugit, ilusilersorneqartarnissaannut tunngatillugu, meeqqanut inuusuttunullu atortut (assersuutigalugu atuartitsinermut atortut pinngussallu) sapinngisamik tapiissuteqartartunit tapiiffigineqartarnerat minnerpaaffianiitinneqartassaaq, tassunga ilanngullugit tapiissuteqartup aqqanik, ilisarnaataanik, nioqqutissap meeqqiinik assigisaannilluunniit ikkussuisarnerit eqqarsaatigalugit.

4.3. Piginnaatitaaneq

Kommunimi ingerlatsiviit kajumissaarutaasimanngitsunik tapiissutini tunniunneqarsimasunik isumaqatigiissuteqarsinnaatitaapput. Ingerlatsivimmi taperserneqarnissamik isumaqatigiissusiortoqarnissaani kissaateqarfiusumi pisortaq aalajangiisinnaatitaavoq.

Isumaqatigiissut ingerlatsivinnut arlalinnut atuutissappat taava kommunaldirektøri aalajangiisinnaasussaataaassaaq.

Suliffeqarfik imaluunniit kommunip avataani immikkoortortaqarfik pineqarpat, ingerlatsivik akisussaasuusooq, atuisut siulersuisuisa inassuteqaataat malillugu, aalajangiisussaataaassaaq.

4.4. Kommunip iluani akuersissuteqartarnermik periuseq

Taperserneqarnissamut isumaqatigiissutit atuutilersinnagit pisortaqatigiit tamatigut ilisimatinneqartassapput akuersissuteqarlutillu.

Tamatuma saniatigut ataatsimiititat siulersuisulluunniit allat peqataatinneqarnissaat pisariaqarsinnaavoq.

Suliffeqarfik siulersuisulik, atuisunik siunnersuisartoqatigiilik, qanigisaasunik siunnersuisartoqatigiilik assigisaanilluunniit, pineqarpat taava taakku, suliffeqarfimmi pineqartumi malittarisassat atuuttut tunngavigalugit aalajangiinermi peqataatinneqassapput.

4.5. Isumaqatigiissusiornermut piumasaqaatit

Taperserneqarnissamik isumaqatigiissutitut tunngatillugu allatamik isumaqatigiissuteqartoqartassaaq. Tapersiisumik isumaqatigiissuteqarneq Kommuneqarfik Sermersuumi Taperserneqartarneq pillugu Politikimi piumasaqaatinut naapertuutissaaq.

Siunertamut isumaqatigiissutitut malitassaq malillugu isumaqatigiissut atorineqartassaaq. Isumaqatigiissutitut malitassamit allaanerusumik isumaqatigiissutaasoq Pisortaqatigiinnit akuerineqartassaaq.

Ussassaarutip ilusaa imarisaalu kommunimit akuerisassanngorlugu nassiunneqassaaq isumaqatigiissummilu sukumiisumik nassuiarneqarluni.

Akit akiliisitsiniutillu isumaqatigiissummi sukumiisumik nassuiarneqassapput.

Isumaqatigiissut atsiugaq kommunimut nassiunneqassaaq.

Ingerlatsivimmi, isumaqatigiissusiortiusumi, pisortaq isumaqatigiissutit imarisaanik, kiisalu inatsisinut atuuttunut naapertuuttuuneranut qulakkeerinninnissamut, akisussaasuuvooq.

Isumaqatigiissutit atuutilersut tamarmik Excelimi nalunaarsorneqassapput aamma GO-imi pilersinneqarsimassapput allanngutsaaliorneqarlutillu.

4.6. Isertitat

Aningaasanik tigoriaannarnik isertitaqartoqassappat, isertitat tunngaviatigut ingerlatsivimmut aningaasaliinerit pillugit isumaqatigiissusiorsimasumut tussapput. Isertitat 20.000 DKK amerlanerusimappata taakkua kommunimut tussapput.

4.7. Aningaasartuutit

Taparserneqarnissamik isumaqatigiissummi aningaasartuutissaqartoqarpat illuatungiliuttumit akilernerqartussaangitsunik ingerlatsivik nammineq missingersuutiminit taakkununga akiliisussaassaaq.

4.8. Tunissutit, crowdfunding il.il. pillugit

Kommuneqarfik Sermersooq iliuuseqarluni innuttaasunik, suliffeqarfinnik, kattuffinnik, peqatigiiffinnik il.il. kommunimut tunissutissanik tunniussinissamut kajumissaarineq ajorpoq.

Tunissutit kommunimit tiguneqarsinnaassappata kommunimi inatsisit naapertorlugit siunertanut naapertuutissapput.

Kommuneqarfik Sermersooq tunissutinik tigusinermut atatillugu malittarisassanik malinninnissamut, tassunga ilanngullugu akileraarusiinerimut tunngasunik, akisussaasuvoq. Kommunimit tunissutit tigussaasut atorineqassappata, tunissutit malittarisassanut atuuttunut kiisalu suliat allaaserineqarnerinut naapertuunnersut qulakkiissallugu kommunip akisussaaffigaa.

Atorfillit, qinikkat allallu kommunip iluani inuussutissarsiuteqartut sulinerminnut atatillugu inuttut namminneq tunissutissanik tunineqarsinnaanerit pillugu malittarisassat Peqquserluttuliorneq akiornarlugu Politikkimi allassimapput.

4.9 Pissutsit immikkut ittut

Suliffeqarfiit imminnut pigisut taparserneqartarneq pillugu politikkimut matumunnga ilaanngillat.

Aalajangiisoqarpoq minnerpaaffissatut killiliussaq 10.000 DKK-iussasoq. Tamatuma kinguneranik isumaqatigiissutinik nalinginnaasunik aallartitsinissaq pisariaqanngilaq.

5. Aningaasatigut inatsisitigullu killiliussat

Kommuneqarfik Sermersuumi Aningaasaliinerit pillugu Politikkimi, Tuniniaanissamik nittarsaassisarneq aamma nalunaaqutsersuisarneq pillugu Inatsisartut inatsisaat nr. 39, 9. december 2015-imeersoq (tuniniaanissamik nittarsaassisarnermut inatsit) tunngavigineqarpoq.

Kommunip inatsisini aalajangersakkat malinneqarnerisut qulakkeertussaataavaa.

Tuniniaanissamik nittarsaassisarnermut inatsit assigiinngitsunik nalinginnaasunik killilersuutunik imaqarpoq, ilaatigut paasissutissanik uukapaatitsisumik imaluunniit eqqunngitsumik allassimasunik atueqqusaannginneq imaluunniit paasissutissanik pingaaruteqartunik ilaatitsinngitsooqqusaannginneq, kiisalu imarisamigut, ilutsimigut imaluunniit periaatsimi atorneqartumi atuisunut imaluunniit inuussutissarsiummik ingerlataqartunut ileqqorissaanngitsumik sunniuteqartumik misigititsisumik inerteqquteqarneq.

Tamatuma saniatigut tuniniaanissamik nittarsaassinermut inatsit meeqqanut inuusuttunullu saaffiginnittumik tapersiinissamut tunngasunik aalajangersakkanik imaqarpoq. Assersuutigalugu tuniniaanissamik nittarsaassineq meeqqanut inuusuttunullu sammitinneqartoq, meeqqat inuusuttullu pissusissamisoortumik uppertikkuminarneri, misilittagaqannginneri isornartorsiuisinnaannginnerilu, sunneruminarnerannik piumalersikkuminarnerannillu malitseqartartoq, eqqarsaatigalugu ilusilersorneqassaaq. Tuniniaanissamik nittarsaassineq toqqaannartumik imaluunniit toqqaannanngitsumik nakuusernissamik allatulluunniit navianartumik soqqusaatsumillu pissusilersornissamik kaammattuissanngilaq imaluunniit pissusissaanngitsumik nakuusernissamik, ersiortitsinermik imaluunniit upperisapalaaqarnermik sunniiniutitut atuiffiussanani. Tamatuma saniatigut aanngajaarniutunik, ilanngullugu imigassanik aalakoornartortalinnik eqqartuinernik, assilisanik imaluunniit innersuussutunik imaqartinneqassanngilaq.

Taamatuttaaq kommunimut pilersaarutini aamma kommunimut pilersaarummut tapiliussani atuuttuni aalajangersakkanik attuumassutilinnik peqarsinnaavoq.